

Ebazpena: R 70/2023

Espedientea: 29/2018

Vitoria-Gasteiz, 2023ko ekainaren 23a.

Euskal Autonomia Erkidegoarekiko Ekonomia Itunaren Arbitraje Batzordeak, Violeta Ruiz Almendral batzordeburu andreak eta Sofía Arana Landín batzordekide andreak eta Javier Muguruza Arrese batzordekide jaunak osatutakoak, honako hau erabaki du:

ERABAKIA

Zerga Administrazioako Estatu Agentziak (aurrerantzean, ZAEA) Gipuzkoako Foru Aldundiaren (aurrerantzean, GFA) aurka planteatutako gatazkari buruzkoa, zeinaren helburua baita zehaztea nor duen eskumena PSA sozietateak 2012an eta 2013an egindako lan pertsonalaren gaineko atxikipenak ordainarazteko; zehazki, gatazka zerbitzuak ustez lurralde erkidean eta atzerrian eman zituzten langile jakin batzuen lan-atxikipenen ingurukoa da. Gatazka hori Arbitraje Batzorde honetan izapidetzen ari da, 29/2018 espediente-zenbakiarekin.

I. AURREKARIAK

- 1.- PSAegoitza fiskala Gipuzkoan daukan sozietate bat da.
- 2.- ZAEAK, 2016ko urriaren 3an, egiaztapen-prozedura bat abiarazi zuen, zehazki, zerbitzuak ustez lurralde erkidean eta atzerrian eman zituzten langile

jakin batzuen 2012tik 2014ra bitarteko lan-atxikipenak ordainarazteko eskumenarekin lotuta.

3.- Egiatzapen-prozedura 2018ko otsailaren 19ko data duen txosten batekin amaitu zen; bertan justifikatzen zenez, akatsa izan zen aipatu langileen atxikipenekin lotuta GFari guztira 138.962,35 euroko diru-sarrerak egitea.

4.- ZAEAk, 2018ko apirilaren 4an, aipatutako diru-sarrerak bidaltzea eskatu zion GFari.

5.- GFAk, 2018ko maiatzaren 17an, onartu egin zuen 2014ko lan-atxikipenak bidaltzea; aldiz, atzera bota zituen 2012ko eta 2013ko bidalketak, preskripzioa argudiatuta.

6.- ZAEAk, 2018ko uztailaren 17an, inhibitu zedila eskatu zion GFari; aldiz, 2018ko abuztuaren 8an, eskumena berea zela berretsi zuen GFAk.

7.- ZAEAk, 2018ko irailaren 10ean, eskumen-gatazka planteatu zuen; 29/2018 espediente-zenbakia esleitu zitzaion, eta prozedura arruntaren bidez izapidetu da.

II. ZUZENBIDEKO OINARRIAK

1.- Arbitraje Batzordearen eskumena

Arbitraje Batzordeak eskumena dauka gatazka hau ebazteko, Ekonomia Itunaren 66.Bat artikuluan xedatutakoaren arabera; artikulua horrek eginkizun hauek ezartzen baitizkio batzorde horri:

«a) Estatuko Administrazioaren eta foru-aldundien artean edo foru-aldundien eta beste autonomia-erkidegoetako administrazioen artean sortzen diren gatazkak ebaztea, bai tributu itunduen lotuneen aplikazioari dagokionez, bai administrazio bakoitzari zenbateko zatia dagokion zehazteko, sozietateen gaineko zergaren edota balio erantsiaren gaineko zergaren baterako tributazioaren kasuetan.

b) Banakako tributu-harremanetako arazo zehatzetan ekonomia-itun hau interpretatzeko eta aplikatzeko orduan administrazio interesdunen artean sor litezkeen gatazkak erabakitzea.

c) Zergadunen egoitza dela-eta sor litezkeen desadostasunak ebaztea».

2.- Preskripzioa

Arbitraje Batzordeak 11/2014 Ebazpenean eta Auzitegi Gorenak 2015eko abenduaren 15eko, 2022ko otsailaren 10eko, 2020ko abenduaren 3ko, 2021eko urtarrilaren 28ko eta 2020ko maiatzaren 18ko epaietan (ECLI:ES:TS:2015:5337, ECLI:ES:TS:2022:596, ECLI:ES:TS:2020:4077, ECLI:ES:TS:2021:372 eta ECLI:ES:TS:2020:1010 epaiak, hurrenez hurren), irizpide konstante bat ezarri dute: administrazioen arteko eskubidea izaera publikoko aurrekontu-eskubidea da, administrazioak zergadunaren aurrean duen zerga-eskubideaz bestelakoa; eta administrazioen arteko eskubidearen preskripzio-epea bidegabeko diru-sarrera egiten den unean hasten da, eta ez da eteten zergadunaren gaineko eskumenaren jabetzat jotzen den administrazioak (hirugarren bat izaten da administrazioen arteko harreman juridikoan) zerga-prozeduran egiten dituen jarduketan ondorioz.

Horiek horrela, Arbitraje Batzordeak honako hau

ERABAKI DU

1.- Preskribatutzat jotzea Zerga Administrazioko Estatu Agentziaren Gipuzkoako Foru Aldundiarekiko administrazioen arteko eskubidea, 2012an eta 2013an egindako lan pertsonalaren gaineko atxikipenak ordainarazteko erreklamatzeko.

2.- Jakinaraztea honako erabaki hau Zerga Administrazioko Estatu Agentziari, Gipuzkoako Foru Aldundiari eta PSA sozietateari.